

喙

鳴

文

集

喙鳴文集卷十六目錄

墓誌銘

禮部員外郎典內閣制勅房事顧君墓誌銘

樂安丞陸和叔墓誌銘

南京禮部尚書孫公配楊太夫人墓誌銘

屠漸山配項宜人墓誌銘

沈徵甫母吳宜人墓誌銘

王懷棘父母墓誌銘

劉柱峰墓誌銘

陽明文集卷一
喬玄洲暨妻合葬墓誌銘

許鴻川墓誌銘

沈芷陽墓誌銘

長垣崔封君墓誌銘

定國徐西亭墓誌銘

陳羽泉墓誌銘

秦寧侯母夫人墓誌銘

余僧果墓誌銘

贈鴻臚伯兄斗門公暨夏孺人合葬墓誌銘

喙鳴文集卷十六

四明 沈一貫肩吾 著

墓誌銘

禮部精膳司員外郎典內閣制勅房事顧君

墓誌銘

余出入承明廬識錫山顧元濬丙子戊寅往來吳中又交元濬父九華先生九華先生攻詩喜山水手藝花木于惠山麓曰黃公澗者觴予其間後十年而九華瘞焉元濬甫五十加四尋亦卒何遽也

君雋雅溫夷典筆札于石渠校閱世穆兩朝
實錄及大明會典辦理內閣制誥兩房事預修玉
牒時寫篆冊寶拜寶鏤文綺之賜自國子生試中
書舍人滿考為真擢大理右評事又三滿考陞右
寺正至禮部精膳司員外郎國家革中書省而存
其舍人機事歸內閣置兩房簡舍人以充舍人官
七品積勞加他官重之有至尚書者後稍為制止
四品而服俸無所限如顧君皆加銜寶典中書舍
人
事也君周慎不洩得相君心常以父老請告而

申公余公許公交持之不許王公新從南來君祈
王公而王公言吾過梁谿見汝家封君未言欲子
歸也為柄事者所嚮如此識古書畫彝鼎且能急
人難門多長者轍內行修飭居家庭姻族昆弟間
備有恩錫山之言孝弟者歸焉終父喪再入京未
拜命而沒既瞑更視其子曰爾祖置合享田令宗
子世世守勿墜載在邑志我死小子勉之蓋君之
先由晉尚書君叔者令無錫命一子家焉九華創
祠于惠山合尚書以下十二室享之而置田若干

畝以屬元濬故元濬死猶囑如此所娶呂孺人上
舍呂小泉女而太僕少卿思泉孫女四子林本禾
皆太學生采順天府學生二女適胡元揚李芳春
孫男四葬在南林阡君名祖源元濬其字別號復
惺九華先生名起綸鬱林州同知封大理右評事
娶孺人楊而生君九華三子君其長九華父為鴻
臚通事可文世父為柱國光祿大夫太子太保禮
部尚書可學所後父承事郎可賢世居邑之芙蓉
山遷泰定里銘曰惟國家大本在樞機所用必才

如顧君者蓋其人哉衆方儀之何遽逢其災嗚呼
斯阡我心孔哉

樂安丞陸和叔墓誌銘

陸鄧之望也自大司寇康僖公亢宗其後第進士
者九人舉于鄉者八人以貲雄于里者視此然子
姓亦稍稍怙寵矣逡巡大訓如樂安君者足述焉
君諱激字和叔先世蓋敬輿七世孫評事忻家會
稽又七世升之提舉市舶家慈谿又五世元家鄧
之月湖西元三世而有應吉應吉生瑜是為康僖

公其次理贈兵部員外郎理生堙堙生仲仲生福州府經歷銑娶于錢是為君父母而君側室周出也穎異福州常携以誇客大中承定齋王公字焉五歲喪福州輒擗踊賴錢母護持得不毀弱冠入郡庠已游太學而喪其二母于是嚴伯兄夷庵君以所事大人者事之析著辭多受寡喪之蔬布浹期喪其仲明湖君又然撫諸姪如己子而女兄為南湖余太史婦者孀且貧購椽居之割貲奉之卒而後已蓋篤于孝弟若此所賑恤者于昆季伯叔

不問疎親也于鄉黨姻戚不問識不識也最著者族兄盧白老無子挾以同居時問其安否稍宴起親剥啄呼之撫摩起之死而殯之疑于同產云宗人有析居者必曰使和叔主分又善貸于人之橫施者若無有即其人麗于罪猶謀所以生之負錢者多火其券謁選為山東樂安丞丞卑秩多自汙而君獨重丞後刑罰先教化節孝者時分俸賑之惡少李邦卿群號十虎今捕之不能得君曰此威之益自雄不如以禍福諭之乃多為檄揭諸衢其

親戚長老交咎讓皆自歸改行矣兩臺用是交獎
死囚陳印稱母病求一訣縱之期以旦日來簿大
詫曰脫免可復得邪君迫然曰彼亦人耳越宿果
來鄙有貴人被禦典捕者懼得罪妄繫以充君曰
毋讎且湏之躬督之得他盜即所掠貴人盜也而
前繫皆獲釋君假令數月聲踰于真而長子挺殂
于邸哭之不起民之哀號輓奠于道者數十里是
為萬曆庚寅正月而距生辛卯周一甲子配為王
中丞季女未嬪而中丞卒中丞子又卒太淑人周

惇惇無居而君奉之于家曰生于我乎養死于我
乎葬贍田百畝舉歸之王氏孫中丞名應鵬嘉靖
朝名臣有奏議若干卷散亡詩若干卷君梓行于
世孺人慧敏善事其姑晨曉夕珍疾病湯藥必躬
綱紀家事犁然有條歸三載而倍先業稱女丈夫
云先二十年卒繼鄭孺人亦克遵業子男五挺棠
檯校柳君柩歸自齊諸子刻木而肖之余嘗為之
墓茲壙于郡南二十五里周學士橋而余銘之銘
曰世祿綿芊我有平原資富能訓時惟樂安躬服

孝友斥財立義砥障人波物執度制豈其立功必
顯與貴隨牒一旅佐時本理錫孝孚冥死囚可歸
布德易螯螯鼓斯希政無龐茸民罔委罷解繩之
亂觀風嗟咨澤留觀還或賻或啼痊德之膺後天
不歌

南京禮部尚書孫公配楊太夫人墓誌銘

蓋今之稱望族也難古者父子兄弟相任今用制
科故難江左尤難若餘妣孫其選矣孫自忠烈而
下四世成進士者七舉鄉試者加二錦衣至都督

及賢郎博士員無慮數十忠烈子孫鮮弗冠帶者而七進士又盡魏科顯官褒然大雅立朝脩脩羽儀素德與舊祿齊衡人謂天道余觀天道則然而世之炳大義樹顯烈者子孫不盡然抑滋培灌溉力哉宰物何私焉且家所難尤難內德內德不過周旋庭宇間而衣以裏紉臺由基高家之大無弗繇世所稱刺臬饒饒未足槩淑媛之行若楊太夫人可誌也太夫人忠烈季子配季子者南京禮部尚書贈太子少保文恪公陞也太夫人上世關西

太尉至宋入于汴南渡入仁和父應獬賢科起家
至伊瀋長史娶于王生三子五女太夫人居其中
婉慧受內則列女傳諸書時涉他經史為詩麗而
則長史公撫之曰兒胡不為男子雖然必字佳男
子以是偃蹇數姓而會文恪公喪其先夫人韓也
請為繼長史公謂忠烈不亡壻亦非常人也於是
太夫人歸于孫太夫人歸于孫也於文恪為益友
初文恪舉于鄉為鄉里教授與二三友課藝太夫
人則篝燈侍夜手編錄助勤也既第進士守史官

歷宮采司成至太宗伯所典文學諷議編摩之事
太夫人綴功補義麗澤弘多今太夫人詩若干首
附文恪集中世謂之班姬曹大家也事文恪母為
孝婦文恪母一品夫人楊也性嚴重有矩矱而太
夫人歡承之在尊卑親屬之間雖雖然雖出都會
而節約無華以勤勞先子婦中外家衆數百指斤
斤如也蘋蘩之薦必膺必夙潔齊穀醴以待賓客
僕饌馬芻不戒而具于文恪諸子孫為嚴師先是
韓夫人有二子鑰鋌太夫人亦有二子鏐鏐女一

鑲而側室馬一子鑲太夫人鳩哺之諸子就外傳
太夫人從梱內督出菓餌勞苦談藝不倦四子接
武取高第雖晚節諸孫口授手畫伊吾之聲徹戶
而女鑲子呂胤昌亦長于諸孫間無何而長孫如
法與胤昌並舉癸未人謂太夫人成四子進士而
不遺其一女也惜鑲歿耳世仕宦常在京師伯氏
籍錦衣聚族而居視餘姚更如客凡三南輒北最
後以鑲在吏部居數歲遘疾逝前數日鑲自文選
郎遷太常少卿猶忍見其金緋所享年自正德乙

亥至甲申凡七十先以文恪封孺人再封淑人後
以鈺稱太夫人四拜誥也鑰光祿寺卿娶御史錢
公女封恭人鈺南京禮部右侍郎娶尚書魏公女
封宜人銍河南右布政娶尚書陳公女封孺人鑛
太常少卿娶少宗伯胡公女封宜人鑲順天府庠
生娶太保陸公女鑲遼少傅呂公子禮部主事允
孫男五如法刑部主事娶編脩史公女如沚餘姚
縣庠生娶行太僕卿姜公女如涇娶僉事陳公女
如洹聘太學生沈君女如泗幼孫女八苑馬寺卿

邵公子太學生柱周叅議蔣公子庠生一豹按察使楊公子秉珙叅政李公子庠生劭之叅議胡公子庠生正遴副使管公子庠生可成庠生李君子庠生機其壻也一未聘曾孫男二以孚以貞女二俱幼乙酉仲冬二十有四日葬月山 天子命所司合文恪韓夫人祭而開壙禮也不佞與方伯同年逮識光祿于朝事少宗伯于詞林舉鑛及如法于南宮耳太夫人甚熟聞鑛嘗戒其友曰幸以札來者毋詭毋譖歷吾母而後及我慎之也繇此子

姓所交無匪人所聞無匪言質行不阿固宜銘曰
舜江世族燭湖今宗英人踵起昭孝顯忠豈繫士
範亦有女則肅恭夫人慶祥烏奕綉規衿禮恭德
組文輜輶命富浣濯當貧光輔夫君翼風宣軌貽
穀多男方輶結趾既女而儒亦慈且嚴班左庶正
文孟將參寶婺俄沉九原是即曰祔伊何月山之
域我其銘之勒于玄宮金石流耀裔流臻風

屠漸山配項宜人墓誌銘

嘉靖中稱明德而顯於世阼於數不究者為漸山

先生先生卒又四十二年而其配項宜人廼卒一
顯於仲子律再顯於叔子方與其孫謙而昌融之
業益起不佞蓋與孫謙同舉聞其概又二十年而
讀其子侍御君狀是大邦之媛也屠項皆樵李聞
族項之大以大司馬襄毅公而屠以大司寇康僖
公兩家擘相映矣宜人襄毅孫叅政貽菴公子母
田恭人其嬪諭德先生則康僖嫡子也天與莊靈
通女史列傳大義甫十三母恭人卒叅政公欲不
娶宜人曰烏有卹女孤而鰥其父者乎逮繼母歸

悉出其母藏不私二十而適諭德公諭德公纔志
學耳而康僖捐館時庶兄已貴家衆壘立宜人病
於大幾遇事無所凝滯內外斬然事姑太夫人惟
志是承雖所使媵婢無失嘗遇疾醫禱罔功宜人
剖股和羹以進病良已又以其間佐公讀篝燈拂
几手機杼而襄之成進士衡鵞於秘館不以家為
皆用宜人能婦也公既文益有聲戊子以刑部主
事與試江西宜人奉太夫人歸事竣太夫人安于
家不欲行宜人侍而買一妾膏沐見於公曰燕中

遙夜差慰寂寥其婉至之致具蘭暉堂集中後五
年公省覲歸宜人字側室女若已女也復從北上
以禮部郎滿秩受封諭德公受特知政翰林修撰
侍讀進今官所交傾海內而尤與關中趙景仁江
右羅達夫吳永之唐應德善騎從還往宜人從
中治修醴醕而自所儲最下具辛丑念太夫人
老謁歸而太夫人逝明年公亦逝宜人數求從不
得撫其孤慟積經史而督之誦曰此而父所習也
未辨邑而起臧獲次署夕則考其成與諸子計誦

讀與諸婦計組紉以是屠宗日起其胤子日顯而人謂宜人能母庚戌仲子律令弋陽教以居官蒞衆之法甲寅倭難作仲子為侍御迎宜人於留都寇平徙郡城仲子卒於官隆慶戊辰萬曆丁丑孫謙叔子方後先成進士丙戌叔子按南畿見宜人病且留丁亥獻歲宜人視諸子談生平風示無忘而後登假暇矣宜人世鼎貴而閑於家婉孌恭孝天性篤至嘗誡諸子毋務華母過謹毋踐滅獲有過即不可掩再三誨令政而後已為李子買宅券

成而中爨衆議減直宜人不可曰嘗見食言而肥者耶有嫠婦乞衣心許之月餘不來則已物故貽其家曰不負言吳俗好媚鬼而宜人獨不里婦之講張者莫窺其閤晚益怙澹危坐一榻足不闕者二十年疾則召其女富曰汝嫗事庶善吾終屬續之日屏侍人獨富孺人與二女浴可謂生死由禮矣宜人既羹股以療姑而身病孫大壯亦復刲股宜人事母順而吳恭人不解髻侍疾卒死孝宜人孝慈友儉有樛木恩而死之日享年九十有一體

所遺者八十五封君一侍御二督學副使一鄉舉
一諸嶽嶽頭角不可量也語曰子孫視汝雷復其
虔信哉以是年某月日啟諭德公壙而合銘曰天
不秘瑞寶發明地不秘圖嘉禾呈天地秘發元媪
生孳黃孕玄殷砰砰是為屠奴項娥英有斧而封
式其塋

沈徵甫母吳宜人墓誌銘

沈之望吳興凡並浙而家者宜同出矧姚江於我
旦夕近也與一貫同舉進士者應文徵甫徵甫尊

人奉政公諱譜嘉靖甲子遊京師占其籍而試既第矣都人噪其籍報罷其配吳宜人故某郡守同邑某之孫父曰必仁上掾計方是時奉政父溧陽丞未除挈妻子留都門婚焉無何吳父病死獨一廢一少女宜人白大人請收其父迎其母若妹而居也蓋溧陽公旅食久姑韓嚴而奉政雅多學士游宜人兩養外內親劬劬乎難哉溧陽公之為丞也庶罷官則無所生奉政十九在外不能視金殮而宜人代為之子比舉徵甫兄弟又宜人代為之

父奉政茂實嘗為里人侵而宜人又為之持門戶
稱丈夫一日廝養子逸豪持而恐之宜人曰奴死
則瘞耳且生死未可知無煩公等於是豪不敢言
比徵甫為池陽理母居中佐之徵甫朝京師而宜
人卒邸中惟二季與徵甫妻俞在然誠信無悔矣
年四十有八所生子先徵甫者應欽邑諸生二季
曰應麟應暘所生女一適諸生史元蒸一適陳大
勲元蒸父某官自上大勲父太學生養正所撫諸
孫欽之婦邵生景元景亨景賢俞宜人生景初聘

其官史元熙女而俞宜人從宜人而養於地下也
不遠徵甫再娶於童亦封宜人未有子麟之婦陳
生景裕賜始娶於洪稱奉政與宜人者今天子
加兩宮徽號於時徵甫為南選部大夫矣詔得封
若贈云宜人狀同官郎周君光鎬所為徵甫馳以
徵余銘銘曰攻勞得逸攻苦得甘終身之勤以有
珈簪和婉婦師貞憲女男子孫第祿食其餘饒有
封如堂母儀所函

慶府右長史贈兵部尚書棘亭王公暨配都

夫人趙夫人合葬墓誌銘

曩懷棘王公以名御史按予浙登良汰墨有范孟
博風而每登高望遠作英英白雲天際想謂太夫
人在堂也比拜少司馬協理戎政奏績晉大司馬
而太夫人之問至公痛絕念先嚴未有銘也請銘
及太夫人翁諱允武字德毅別號棘亭先山右人
五世祖貴徙廣平貴生柔柔生玘玘生友友生翁
父臣為諸生有聲翁亦年十九補諸生歷試異等
而用歲舉入太學是時元配都夫人與偕卒再娶

趙夫人夫人丘縣趙公奇女是生懷棘公已而翁
謁選夏太宰邦謨奇之署判南康南康壩郡也前
吏染指逋賦至七八年翁一切謝苞苴請託條緩
急示賦期期來而賦集時東南被倭徵西粵狼兵
兵獷悍翁檄其帥謂朝廷徵爾勦倭爾毋為倭供
餼弗稱罪予稱而兵敢譁罪爾予與爾分受責帥
聞凜然勅其下而翁無乏其供人人醉飽去其長
於濟變與馬燧柳公綽事正等饒州萬年令腹餉
為機兵所訟聽者私之衆愈起徐直指急之而會

翁上謁屬翁翁置令於理而重繩其首亂郡中帖
然因牒翁署萬年半歲而尸祝翁稍遷兩淮都轉
運副使或諷翁盍為子孫計翁謝曰老嫗也不可
以歸而當道有嚙翁者遂遷慶府右長史且用老
疾免時年五十有七撫臺劉公景韶為之泣且慰
之曰君有佳兒足重無念翁歸而居穀掾若旅所
以道大司馬者有千卷書佐於內恃太夫人不難
脫簪珥以歡其姪翁廉則以淡佐翁儉則以勤佐
翁既功家益落太夫人提大司馬勉之曰吾聞積

白吏子孫必昌是在兇矣丁丑大司馬成進士為
行人又勉之曰而父言貪酷二字當官第一戒而
父汝師也性不喜逸晚猶率大司馬夫人甯日課
紅訓子若孫曰驕奢淫佚非保家理有自來哉庚
子冬太夫人痺大司馬屢乞歸不得則迎養于邸
太夫人欲歸請奉之歸又不得乃遣其子三聘奉
歸歸數月不起是時有覃恩贈翁兵部尚書都夫
人與太夫人皆夫人其訃也 上特賜奠祭有加
遵異數煌煌啟棘亭翁寔而合銘曰軒軒棘亭矜

修勅已潔其深源濬為濯濟官以寒身門方大子
乃開鉅公典皇會旅絲綸煜爚織于織縷數或先
畸而德濟美兩配偕藏群玉萃止銘億萬年于歲
乙巳

河南按察僉事封吏部左侍郎兼翰林院侍
讀學士桂峰劉公墓誌銘

歲壬寅重九河南僉憲封少宰學士劉公卒賜祭
葬如例公諱勅字仲安先興州人五世祖興徙任
丘依金沙嶺而居是生亮亮四子季曰賦生際璟

三子仲曰秦公父也贈如公官高邁涉圖史一票
于先正人稱為天鄉公配泮人張生四子公其仲
公幼而俊穎不讀童蒙書輒通經十四為邑庠生
試高等二十一為嘉靖癸卯取鄉薦庚戌成進士
得新建令新建在江西省會繁公曰吾聞積誠待
人人必感積誠應事事必治患不忠信患新建哉
與百姓休無為鄉先生魏都諫者高節屏居不入
城市為邑有賢令出山上謁人以是艷談豪宗人
恣公鞭其橫者群數百遮窘公公曰令奉天子

命長一方官不卑若等欲效宸濠反耶民號呼填
道謂豪宗輓我父而臺司以聞詔革其甲爵慰勞
公視事當是時公幾不免而卒摧彊宗用善政得
民也交章薦者謂烏臺青瑣虛席矣而竟以不諛
得戶部人攀號車枳不行居戶部為堂卿雅重督
餉薊門多擘畫亦以不徇權貴生蜚語司爵者念
公久勞擢僉憲分巡河北道兼飭兵備澄官邪剔
吏蠹鎮宗藩抑彊禦輕徭薄賦弭盜安民山賊標
掠為患設經略減之報功天子賞銀幣然無何

而薊遼曩邇者為權貴嗾追劾公歸矣忠而被謗
河南北人扼腕焚香獻欵延送五百里夫非直道
不泯於民耶時方彊仕而絕口時政與親舊往來
恬愉優游下至耕夫野老坦坦施施不知有貴賤
也事無巨細必盡其心衆無顯微必接以禮常敬
讓人愛濟人人稱之曰佛六十年如一日子少宰
中丞二君並巍科膺仕每貽書勉以移孝而二君
咸殫力奉公式穀也素彊無恙中風左枯醫八月
不起少宰中丞無歲不乞歸八褻請尤力顧中丞

撫浙不得釋而少宰以弗俞病至廢日講益披瀝
陳情上乃許省覲驛馳歸五月而公病尚幸視
湯藥含殮即中丞留滯浙中少減其終天之恨天
賜也生癸未正月一日距卒年八十有一其封以
少宰任滿配章氏封泚人少宰長子元震辛未進
士歷今官掌詹府娶郟城尹張君女繼南陵尹鄺
君女再繼儒官熊君女中丞次子元霖庚辰進士
歷吏部郎右副都御史巡撫浙江娶戶部郎李君
女繼鴻臚鳴贊張君女又次子元霈娶大同守蘇

君女蚤卒女一適少傅大學士李公孫濂孫男胤
賢官生少宰繼子娶洋縣簿史君女孫女適林縣
尹史君子秉厚次二未許人少宰出許聘錦衣指
揮使李君子某中丞出銘曰惟公盛德子惠溫良
所居民慕所去民傷天之福人得全全昌既貴而
富亦壽且康亦既偕老伯鸞孟光亦既裕後威鳳
雙翔厥施未究而澤甚長一丘自適紫誥輝煌厭
而羽化言歸帝鄉山川鬱亂草樹青蒼烝斯嘗斯
奕世無疆

雲南按察司副使玄洲喬公暨配宜人周氏
合葬墓誌銘

始予戊辰館辛氏與上海喬伯梁接舍是年並第
余留京師而伯梁興州從此音未嘗不在耳也伯
梁懷康濟才崎嶇二十餘年今且物予點政機不
得斯人為之流涕公諱木伯梁字人稱玄洲君世
新安人有彥衡者課鹽海上家焉五傳竹溪君晟
六傳太學生鏜公父也贈奉政大夫母儲氏封太
宜人公七歲善屬對十歲能文十三補博士弟子

陸文裕公器之復從袁文榮公學奉政歿喪如禮
辛酉舉子鄉成進士知安吉州州與歸安長興錯
壤吏奸如山又受天目諸泉沮洳多逋賦公勾股
其田如師丹法水嚙城損稼大開倉出賑而築水
矧于四門捍城得無浸有豪殺人不可問者累歲
公一鞠而服稱神君州當貢粟銀臺誤以其副封
上有旨詰問奪公俸公曰固欲言之安吉貧明主
柰何以口實累民也 上感動罷貢粟州故多稅
公復曰柰何與民爭錐刀罷不復征公惠政多而

此其著者三載同知潞安府潞多宗人公進之于
堂而手給其祿不逞者繩以法宗人歡且憚嘗署
汾州州貢紬典機綱解者往往破產公調停如安
吉時而會太宜人病乞歸時已僉憲河南矣倍道
馳不及慟幾絕服闋備兵井陘井陘內捍京師外
轄全晉所控千餘里寇軍實繕關隘罷吳懦獎驍
勇訓習剌擊以其兵為諸道冠有白金文綺之賜
茨溝營卒多為合輒跳輒募礦盜竄其間公選土
著八百人而漸汰之盜始盡歲旱以便宜發粟不

待報可全活甚衆 上籍馮瑞所株連于公治者
無慮數十家悉賴公安叅議福建分守建南弭節
而盜遁為之清租省徭節費以率諸屬然不能阿
直指業轉雲南副使而乞身歸歸則買扁舟與故
人浮遊三吳間方欲起公而遽捐館公誼至高其
在安吉潞安經紀叢令黃守之喪士論偉之分田
贍族為其鄉濬渠二十里鄉人德之特祀奉政公
周宜人處士雲湖女事王舅姑撫諸季在安吉奉
太宜人東歸朝夕溫清如公之在側也可謂賢孝

婦矣公生嘉靖己丑卒萬曆乙未年六十七宜人
生辛卯卒癸酉年四十三子三拱宸太學生娶後
府都事潘允亮女繼娶太僕卿林景暘女拱宿太
學生娶通判陳壽榮女拱璧辛卯舉人娶知府陸
邦女繼娶知州張星女女一適太學生王乾昌孫
男十合葬八灶港嗟夫士競言任乃呼吸安危機
樞得失之際輒袖手余聞公為諸生時遇倭警守
埤賊走東甌守者皆之東公曰是且掩吾西亟備
之果西中礮而圍解比家居朝鮮舶飄海上邏卒

諱為倭耽耽視之公急呵止白當路而歸之朝鮮
君臣具表謝夫以倉卒發機不爽如此真能任已
銘曰謂爾蹇耶名誰爾先謂爾達耶仕胡乃遭惟
爾閭澤氓樂于廛惟爾儻伉解裘而全用之不用
葆其德玄不用之用逮其象賢千古斯丘名玄洲
阡

整飭昌平兵備山西按察使司按察使鴻川

許公墓誌銘

歲辛丑秋昌平兵大夫許公卒于潞河公長余一

歲已矣余尚何宜顧余與公同舉于鄉于南宮襟帶三十餘年不早推挽公而無以慰地下忍也公之起昌平也自謂倦游久矣小草一出惟是王父恩深未酬而叅藩再月可幸徼一贈於是贈矣而有河南按使之命民遮留公直指省垣又交薦公而偶詘于計吏當量移方發潞河歸乃大歸也悲夫公許氏諱應遠字伯漸別號鴻川浙嘉興人世居感化都徙城東六里街國初有實甫者以賑受賜亭號亭子許實甫生子華子華生景新景新生

用常用常生半山公其公曾祖也倜儻好修善著
書工詩年八十五半山生東岡公梧公祖也即所
贈者東岡生少山公燦公父也亦贈叅政東岡老
明經司訓楊州後以子綸舉進士老少山篤行方
聞年不配德元配聞人泚人生公繼張泚人生茂
才應達公甫歲而失母無何又背父東岡實長育
而教誨之十六成諸生二十六舉于鄉猶及東岡
之世三十三成進士授山東東平知州其為治崇
與民休息加意教化一切供應厨傳出納耗羨皆

謹謝司鑰者而明言今不敢潤于若若亦毋自潤
斷獄不深李策盜所守抵死弟勝代繫完所盜賊
郡猶議戍之而公爭之免蘓虎者大猾也監司下
其所誣引于州公竟罪虎而置所引不問有婦誣
其叔方鞠時或俛于門執之則與婦通而族者也
其聽斷明恕類如此巨盜杜邦雍久不得公并其
弟擒之境内逆跡諸生徐文京善古文人莫知公
獎成其名獨以爭水田忤郡守後諸邑田不效而
公聽民藝麥乃大穰守益慙恨中公調遼州遼晉

之僻壤也而公治之如所以治東平者而出趙惟
明於重辟雪省祭黃宗理之誣誤復其官周汝梅
久繫不可釋則聽其輟歸生子以延其祀人稱仁
人之心儒士劉文煥貧當踐更公為免之而勸
學成其名公素擅人倫之鑒于東平得孫侍御琬
于遼分校鄉闈得王大理明馬吏部洙趙平谷永
忠擢刑部山西司員外郎調工部虞衡司典鑄寶
源局錢諸中使嚴公無敢需已司權於清江廠廠
在淮上主舟稅前吏多密網取盈而公疏之行旅

無留入亦不詘清江王公堤潰守臣議開別河避之公不可堤以石公是時則洞河利害于掌中矣而擢都水郎中有弘濟之役弘濟河者寶應越河也先是泗水發天長盱眙入白馬汜光兩湖中漂溺日繼公議于老堤外開越河總河李公王公先後上其奏而朝議難之謂老堤開鑿內外受水非遠策又引白侍郎所開康濟渠用園田木堤便公析言兩策無益徒耗水衡錢而越河成則水性順侵嚙不足患得可而身行河四月成費僅十二萬

金延袤四十里至今為高寶利余曾為之記又于
瓜州創屯船塢使艘自江入者曲折免風濤且甓
康濟舊堤免歲修費范家口裂三百餘丈衆錯愕
莫計公曰塞之感神應就功朝廷酬以太僕少卿
而忌者又隨出為井陘兵大夫未幾三吳言水利
改公為蘓松四郡水大夫發留帑金十萬治之初
直指呂公光洵嘗著書言四郡水以五湖為腹心
三江為脉絡海為尾閭脉絡不通則尾閭洩不時
而腹心壅四肢百骸病故吳淞不濬不入海濬而

支河不開則千流萬派亡所輸支河開而圍岍津
梁與田間之十字河不曲折又太無蓄為旱虞故
公首開吳淞凡七十里次諸州縣支河又次田間
小河及諸圍岸津梁一歲成費減所發半當是時
主爵進公叅政公辭既優敘而病歸歸無何起徐
淮兵大夫而遭張泚人憂又數年補昌平昌平雖
一州而內拱九陵外逼虜有大將偏裨稱鎮而諸
中涓司香者相望皆以軍為私公一切歲時餽問
悉謝絕文武屬吏殿最籍盡秉燭手書值軍政大

計心力俱瘁而諸材官諸中涓皆心懾公毋敢縱
包荒小過未嘗引繩批根人人樂為用所修邊牆
比他鎮多且堅東征調馬多瘦損獨昌鎮馬冠諸
軍虜伯牙兒要撫賞桀驚公諭以威信不敢動近
陵之林麓不戒于火延薰數十里公率諸將撲止
軍儲先兩月給無不以為生我東征後賜公金行
且敘錄而公逝矣公旁通禪觀沒時神氣如平居
戒諸子勿受人賄曰我居官辭任未嘗不斤斤豈
可以死忘初志乎其皜然不滓固天性也而于人

死喪困阨常竭力守遼時前守繕城多費當事者
急之而公持之寢為郎故人陳九德謁選得潛山
令俄遘疾于公邸公親問湯藥棺殮發喪吊者至
答謝如期功將履昌平而前兵大夫陳公一簡調
密雲未行歿於官公經紀備至遣人道之出疆豈
與夫廉潔自命而漠然于故舊者比哉公之功大
者治水弘濟之金隄與吳淞之海口並不朽弘濟
在人耳目前人能頌之而三吳陰受其賜自公後
海口廣下流順四郡水皆以時注潦不為災民徒

見污邪滿車耳孰從而頌公功哉今漕渠病安得
起公療之也公生嘉靖十五年丙申歿萬曆二十
九年辛丑享年六十有六娶聞人氏累封泚人子
九人錫璜國子監生娶郡丞韓相孫鴻臚序班邦
兆女錫璣庠生娶憲副沈鑾孫國子生茂榮女錫
珮庠生娶國子生沈士立女錫璋庠生娶主事項
承芳女錫琳庠生娶僉憲錢于鱗孫國子生象乾
女錫琮庠生蚤世聘御史陳奇謀女今守志錫璠
聘大理卿沈玄華孫國子生文奇女錫瑋錫珍尚

幼女五人一嫁御史盛唐孫國子生洪慶次子庠
生懋春一嫁照磨沈蘭如長子明儒俱蚤寡一嫁
按察使沈伯龍次子庠生中畏一嫁御史曹光孫
太學生如璋第三子纘祖一未字孫男十一人宗
淮宗泗錫瓚出宗濟宗浴宗河宗汝錫璜出宗海
宗汴錫琳出宗洙宗渭錫珮出宗沈錫璋出銘曰
賜亭許蕃孫子啟大叅受嘉祉歷兩州再治水淮
之南水湯湯白馬騰搖汜光鼓石尤飄舠舡公建
議築金堤民子來畚鍤齊越河成不踰時功永賴

今頌之吳淞格五湖濤水維弛莫之食大役興合
衆力躬胼胝捲沙石百世利民不識思河洛是阡
宅

河南汝寧府光州商城縣知縣文林郎芷陽

沈公墓誌銘

余不喜銘人墓銘芷陽也多公之賢而高季子之
誼余嘗與公同公車相得又數年而公攜其季來
余與交稱季子今年為晉方伯寓狀于余曰文兄
第六人伯氏最克家不行其志而未有銘也蓋待

乎作者余受狀而讀之公舉鄉書時諱今聞上春
官更為孚聞字貞孺別號芷陽子封工部君理長
子也工部君父按察公啓而後於按察公弟岱以
此公兄弟兩祖岱公生而慧有遠志長以舉子業
聞精于易時出精義佐其師顧穀奇自乙卯舉于
鄉不收禮闈者七中邁家難為閭左豪所凌以是
益探篋發憤甲戌之役焚舟為期又不第而遊于
酒人然公危棄之而危得之其雋丁丑則迫而後
應且與季子偕也季子以公薦于鄉之後一年生

而同對于廷夫得之有命難易之相遼若此哉公
仕當為令今率計歲月最多減年公之年已在強
仕外而猶委蛇歸省不欲減令得河南商城其民
慄猾公以畫一之法齊之莫敢犯因而勞來之買
犢者踵相籍邑故多大駟巧嘗試而惟其所欲為
群隸曹黨相代為翼虎持上入短長上人乃更畏
之公一朝盡汰之是時有方田之令大抵加賦者
最公謂田即方賦莫可加今不能以剝民最不奉
詔寧解綬以是坐殿而商田卒不方商城之戶上

上者率數姓朋之既析姓戶當下而前令持故猶
上之罄產不償或因緣飛詭脫籍公一切釐正俾
分籍臺使者嘉其便令傍邑視此而汝潁間自是
無以賦蕩產者則尸祝公也公性和而峻遇事有
執其愛民不啻噢咻之而去嘉也務盡蓋懲鄉之
間左豪齟齬者故豪亦王公成耶今四年為萬曆
壬午奉諱歸明年癸未葬工部公而公殞于墓前
毀也距生乙未年四十有九所著有周易日抄十
卷先配閔氏繼黃氏顧氏有丈夫子五人同寅同

生同已同申同陽志皆茂而諸孫復英英蘭茁此
天以報公也余謂公既以乙酉葬又諸孤善箕裘
所為君圖不朽者自諸孤事而方伯孔懷之痛怒
焉不勝余故人也忍無銘銘曰其慧也若迪其厄
也若激季子之賢爾是的爾之光季子用錫安山
之陽爾所適吾為爾銘慰爾寂

封文林郎山西平陽府推官西岡崔君墓誌
銘

長垣崔封公之子曰景榮名御史余癸未闈中士

也封公名聞禮庭訓字家枕鄧岡號西岡子受易
為邑諸生中棄去老以景榮平陽閱封崔之世素
以貲雄業農其為儒自封公父栗封公生而穎異
讀父書日數千言遊黌序益發憤幾有所遇合而
中廢顧其道誼博聞學者宗之羔雁常填門寬然
長者而視義所嚮赴之不隱疆禦至振卹孤寡不
啻其身痛也內眡其家外眡其里人皆肅然莊封
公而封公父亦喜得仲子惡聲不至于耳當是時
封公父所有僅宅一區卒賣以事親女弟兄之子皆

幼孤封公撫之長為婚嫁忘其自出謂封公父也
族有螟蛉子挾富數窘辱封公父為其疆有力也
而忍之且死屬封公曰夫夫已氏之子也亂吾宗
而魚肉我封公泣受命理于官而其人通環瑱自
固侵封公封公之中棄諸生以此然不悔曰吾不
得之身必得之子至于今誰謂天道遠乎若擗之
摘鼓矣既被命稱封公益趺趺為退讓步趾不及
公門推擇為鄉飲三老一應其招不更往而好為
農愈甚斟酌土物裁量暘雨所獲倍曩時然不自

封殖也邑無年悉發賑置產必溢其值曰彼其父
毋妻子得微有流涕戀戀者乎居恒屈指度人曰
某宜然已而果然在數十年後善敗無爽數尚檢
桺華顛彌厲訓諸子一門之內四民之業並興至
景榮勅厲尤至若七品官得言天下事出而攬轡
一方尊嚴若神明得無或弗慎乎歲己亥播州楊
應龍反天子遣李公化龍開府而景榮巡按且
監軍事受命旬月削平之蓋李公女侍御子婦兩
人嫺嫻契密幕中事如一手故功成易大帥綏以

黃金玉帶壽封公封公怒曰吾家四知無夜金公
事無私覲柰何污我故景榮風生幕府功罪不爽
封君素善飯年七十鬚眉鬱然景榮念父數告輒
引大義禁曰春秋不以家事廢王事至是視師益
不敢告不得親易簣然封公謂吾教子為天子
誅大兇靖四國吾獨不為節俠士快矣是為萬曆
庚子距其生嘉靖己丑年七十二配劉孺人有賢
明操舉子七而成者三長景福娶殷氏次景祿娶
劉氏繼周氏高氏次景榮娶王氏封孺人殤者四

而嘗名者曰景華景星女一適千戶于曰盛孫男
七胤祥娶上林苑署丞王進忠女胤茂聘少保李
公女李公即所稱開府者胤昌聘進士李焯女胤
哲聘舉人李先成女胤蕃聘舉人王養民女胤賢
胤廣未聘昌蕃廣皆福出祥祿出茂哲賢皆榮出
孫女七一適按察使郜永春子和鳳一字通政司
叅議王永光子鐔一字國子生李雲龍子不伐一
子庠生陳守敬子禹謨一字舉人李先成子範世
餘未字曾孫巖胤祥出未聘余惟封公有嬖獨之

行三蘊義生風令人感槩波蕩從之一唾涕千金
無所尤豫陰贊其子之節二既已服銀艾矣辭隆
從宸不用而寓諸農三士依倚道秋以就名豈易
覲哉余嘗志孺人墓今復為封公合葬志銘曰蟬
聯之冑望下博陵矯矯封公人爵不升乘耒橫經
風秀于世慾以識匡不寒其義吐珠于澤誰能不
含詭義若仇堙暖是甘不知其父爰眠其子清恐
人知我峨豸史身既永戢夙尚彌高遺芬可挖滌
浮彼囂逴河之陽文螭屬鼎君子之藏過者必式

太師兼太子太傅掌後軍都督府事定國公
贈特進尤祿大夫柱國謚康惠西亭徐公
墓誌銘

萬曆壬寅季夏己酉定國西亭徐公薨于位訃聞
上震悼輟視朝三日以官公孤有勞勩賜祭十六
壇贈特進光祿大夫階柱國謚庸惠少府治北城
給東園秘器葬異數也公孫希臯奉泰寧侯陳公
狀謁余為墓銘於戲是中山王九世孫也中山王
佐高皇帝有天下國于魏而都督公復贊靖難

之業以啟定封一民兩公為皇家東第諸侯冠定
之世蟬聯簪冕至公用忠誠結主知受恩數又為
一時東第諸侯冠盛矣公諱文璧字國璽父定國
公延德母夫人張與孫公生而儀止詳雅敷書悅
禮被服恂恂如也少長齒胄子司成目攝之以為
貴介子安所稟承而馴謹若是習騎射于京營大
司馬又稱之于是 肅皇帝才公典禁兵宿衛
莊皇帝二年肅封尋僉書後軍都督事改掌右軍
都督府督皇城諸門干振 今上為太子冠公假

賓贊冠 上即昨命公攝班首小心畏忌 天子

固心嚮之大婚時公持節充正使其後冊昭妃冊
端嬪冊恭妃冊德妃冊皇貴妃及冊沅懷王進冊
端嬪為妃皆充正使賜子無筭庚辰 上耕籍充

三公禮畢齎蟒服駕幸山陵公扈從有膳羞白金
文綺之賜無何而掌後軍都督府五都督府惟後
府稱要劇非勲望所侍任者弗輕授是歲充知經
筵官真充班首辛巳扈從大閱再賜蟒幣癸未潞
王婚充正使王之國又奉勅領其事 上既數勞

公廼特賜乘肩輿寵異之建壽宮扈閼加少保兼
太子太保尋加太保兼太子太傅總營治之事乙
酉復從閼壽宮賜蟒衣玉束帶各一丁亥冬以數
代 天子郊進太傅戊子復從閼壽宮賜喜字緋
衣一襲增歲祿五十石給三代誥命乙未復以數
代郊進太師丙申葬 孝安皇后護行辛丑皇太
子正位東宮冠充正使掌冠遂充太子妃納采問
名使公無歲不代郊郊已輒受白金文綺於是再
給三代誥命自庚辰來進士恩榮宴主席者八武

闈監試如之皇朝大國封居京師者三本異徹侯而
上又殊嚮公所加秩增祿上尊法膳尚方什器銀絹奴婢之賜不可勝紀公恒孳孳壹得當以報而深唯社稷大計數請建儲正國本他如罷礦稅釋逮繫媿媿為上忠言觸忌諱軍國事若寧夏朝鮮皆奉詔持正論天子雖時俞時不俞而終無甚拂國不可無重臣如此居父喪例不敢謝事哀三年待諸昆季無間言未嘗招致賓客博名聲而內和不與物忤不以貴倨驕人服御無所芬

華食取充味蒼頭廬兒指數千不聞貽籍人昔公
王父太師事肅皇帝為三公名實烜赫公光昭
前德而益大之豈易得哉卒之日距其生嘉靖丁
酉得年六十有六元配王成山伯維熊女封定國
公夫人先公卒繼王有丈夫子六長廷輔勲衛娶
張氏英國公元功女繼湯氏靈璧侯世隆女亦先
公卒次廷佐次廷直次廷佑次廷賢女子六一適
臨淮侯子都督僉事李宗城一適懷寧侯孫承恩
餘未聘孫二長希臯廷輔子嗣公聘楊氏彰武伯

世階女次希夔聘薛氏陽武侯鉅女是歲孟冬辛
卯啟王夫人之窀而合墓在馬鞍山之陽銘曰玄
猗朱蹕武陽之裔八葉重光合符於帝奕世戴德
公滋益昌抑抑小心以植臣綱翊衛三朝總領百
辟桓桓北軍非公誰職焚燎泰時攝事者虔明德
惟馨法宮受蕃王命肅將虔恭匪懈行庀粉斧言
成著蔡雙旌倏遠八鸞孔鉶乘彼白雲歸于帝鄉
天眷冢臣易名具典恩賁有加榮哀不淺鬱彼幽
都松栢芊芊公永憑之于萬斯年

浙江按察司副使羽泉陳公墓誌銘

壬子島夷擾我戊午己未之間幾無民而羽泉陳公令我雖饑易食渴易飲之會我而一食飲不時饑渴不療非仁不活非肅無以為仁至難持我方是時師旅倥傯徵輸餽餉交偪而公有餘暇興學修文時引諸生親課之識不肖于塵埃中不肖弱冠能憶公之所為治者大都不以法假人不私人一物也公諱紀字仲理羽泉其別號甌寧人先世果仁為隋司徒居常州法會為唐閩州刺史家建

陽九世祖旭金紫光祿大夫守太師中書令兼尚
書令魏國公高祖子林亞中大夫曾祖善安沙尤
之難以功授建寧左衛右所鎮撫祖仕瀛嗣鎮撫
父機贈廣東左叅議母倪太恭人公少穎受知于
袁公洪愈舉嘉靖乙卯鄉薦丙辰進士授漢陽尹
朝堂以倭難調天下最有聲者于浙而公得吾鄞
是時王江涇之寇雖殲而渠王直未得大師海上
公所拮据萬方不惜以身蔽民之病召為御史巡
鹽長蘆巡按山西擢我浙按察僉事分巡嘉湖隆

慶己巳參議嶺東入賀萬壽萬曆乙亥擢淮揚兵
備副使在粵時大帥湯克寬詭殺漁浦民千人公
發其罪又言之于朝抵法而怨乃集于公公乞休
銓曹取旨予假後給事陳邦顏魏體明交薦之起
廣東憲副未任丁內艱御史蒙詔又薦之起吾浙
憲副使者交勸駕而公以父老不敢離庚辰終父
喪不復仕矣癸卯三月捐館遡生嘉靖甲申十一
月十五日享年八十元配朱恭人繼張恭人側室
二子三嘉言郡廩生娶徐繼徐守正太學生娶李

繼熊允元太學生娶黃女三壻為雷洪邁謝丹詔
張光楚邁司庾詔楚皆諸生孫男四武陽武周武
祖國鏢陽諸生女孫三曾孫二天申天啟銘曰嗟
陳公以鄞為桐鄉余安能無銘仁而肅是足以熙
公生平發妄殺之罪雖坎壈終其身其仁足稱仁
者之後必有興瞻此瑩

封秦寧侯太夫人陳母盧氏墓誌銘

盧太夫人之舉令侯也五年稱未亡人迄于茲乃
五十年視侯之弱而壯而強而為天子典六師

稱老臣夫典六師於勲臣無兩重矣而太夫人親見之且久斯太夫人之福履太夫人之于侯兼有嚴慈可書也太夫人盧氏京師人父處士君永中歲未有胤禱于神夢有若白鶴飛鳴庭中者而生性婉泚不好弄處士君惜其不為丈夫子也及笄歸先泰寧侯西淮陳公珮勲家享食舊德汰以為恒而太夫人獨謹事尊章無違色於西淮無遽言西淮一意服官不問家而家治嘉靖癸丑西淮棄賓客今嗣侯孱然孤也而疎宗黠且貪者耽耽其

旁銜侯于其吻也太夫人撫而泣曰我難一死也
與哉而父以孤屬我也於是忍死支憊所以擁護
之者萬方長而見諸天子貂珥立朝自侯之嗣
而封母為泰寧侯太夫人侯駸駸有聲播紳間而
太夫人歡欵教之彌嚴曰吾不敢忘檇揭汝無忘
脫吻上時萬曆丙子侯提督操江奉太夫人而南
居七年太夫人小疴侯三疏乞歸予馳傳典前府
戊子被命居守陪京請終養請侍親陳情不一
上意動而丙申有京營之命壬寅四月二十八日

疾卒距生正德庚辰八十有三 上賜祭二壇合
寔于先泰寧之賜丘余覽觀載籍孟母尚矣次莫
如陶母湛歐母鄭皆苦節鞠子為世儀表然砢柱
畫荻第食貧耳非必有外侮今泰寧有點宗之釁
非太夫人擁護安所得此揭揭乎難哉或又言太
夫人化時有異香妙音非偶然生死者矣子嗣侯
良弼娶附馬都尉謝某女封夫人一女適庠生曲
江孫男一聞訓應嚴授勲衛娶惠安伯張某女孫
女三一適都指揮蘭登瀛一適嘉善公主長孫許

潘祥一適豐潤伯曹允成曾孫一幼銘曰五載為
婦五十載毋槌李依稀松栢長久翼子以孤立孤
以荼天降貞嫠豈其非夫式是令子典天子旅
孝慈則忠侯維在矣於太夫人斯千萬年余銘之
辭以燭夜泉

福建左叅政加太常少卿致仕進階中大夫
僧杲余公墓誌銘

語云精潔易辱世用此中君子君子不悔久棄筆
研不為文而吾友冥漠中望我得無銘自齠年與

僧果操觚互殊而相好也人謂我兩人標榜亦自疑以為少未解事姑從所好云而不謂老猶爾如韓愈張籍相為雲龍余稍黠取多而君竟中阻死之日以一劒一書贈我曰別吾老友斯足哀已君有倩曰舒泰初氣節文章似其翁狀世系生平已具余獨貌君神以發吾所欲言君亢厲貞孤必行已志流覽千古知邪正是非當其不可咲為愚自若稟獨用之性受不黨之氣吾鄉頗御史鯨孫觀察光祖與僧果皆以氣伏人之非祥者也余姓廩

名君房字晚謂古君房盡非人而改字僧杲亦足以見君為文必準諸古峻淨而嚴核不欲虛為磅礴委蛇游衍之形豈無雄詞大篇終不瀰瀰夫轂與畫之象人久矣讀其文當知其為人屢蹶于鄉獨丁卯余賀之果舉復困南宮庚辰余又賀之君曰褒然乎余曰可三十名君不服曰倘前一觴爾一後一觴我一榜出果三十三釋褐筮仕僅十載為都水主事典造四夷賜服節省三千緡發商人謫書遷精膳員外郎郎中省會試費百督學陝西

諸僚皆以費不給請君獨否直躬行道無所假借
雖御史首錄士考下下不顧尤慎鄉賢名宦祠諸
生關秦王君曲諸生終不肯庇持大體愛名器尊
尚節孝先禮義檢柅精詳惟問典憲何如人陽服
之而心齟齬不堪也道繇此拙庚寅陞左叅政隨
改山東遂乞骸乙未起福建再乞休詔加太常
少卿致仕辛丑用東宮恩進階中大夫家居不
改舊湫隘而僦負郭讀書游道甚寡往來僅老諸
生朱一誠內弟莊情群弟姪芳鏌輩三四人恥以

其文章資身樹交養聲名來徵者多謝去又多削
藁以為得其辭未必得其意得其意未必得其人
也有傳獨行者當以君為稱首著書若干卷號農
丈人集徵序于余余謂此當對山中桂樹裁而比
得歸不逮矣惠子死誰為我雄談者乎君常謂蘓
子由為其兄作志太謾余今志君亦言其皎皎不
欺崕略耳持此道游于世宜偃蹇能卷猶可不卷
辱將大故吾不悲其不合而幸其能卷令死之日
有僧果也僧果不可一世而人猶名之可謂世盡

無道乎哉君生嘉靖己丑卒萬曆乙未年七十有
七父文深母楊有四子君其季而父弟文湍為諸
生娶毛無子君為嗣子主事時 皇太子生覃恩
得兩贈所後本生始娶于莊生一子試可年十七
卒君哀之以其長兄宸之孫鱗嗣聘袁氏繼娶徐
生三子獻可諸生娶周都運保女行可太學生娶
楊少叅言孫女無可聘屠太守本峻女殤女二長
嫁即舒貢生泰初次嫁張尚書時徹孫子朋孫男
三鉉娶朱太守泰曾孫女鉞聘屠太傅浦玄孫女

鏤聘朱侍御燾孫女孫女三一適李主事生嗣孫
振瓚一適王方伯佐于道京一許吳侍御禮嘉孫
道隆墓在遼湖橋之原與莊合君志也銘曰當世
之人可與權未可與立君獨否介于石也猶推舟
于山轉車于澤也師天而不師人毋自咋也吾徵
諸巫咸為我懌也僧耶杲耶甚善易也葆貞萬年
與天極也

贈鴻臚伯兄斗門公暨配夏孺人合葬墓誌

銘

一貫備員輔察七載而伯兄逝逝又六載始得告
歸墓之木幾拱矣而幽石未章不肖罪也先是兄
嗣泰始以狀來乞銘茲泰始亦親杖屨于地下歲
月幾何而生死倏隔即不肖亦旦暮人耳烏可無
一言以詔永永按兄諱一初字伯復別號斗門是
為累贈光祿大夫柱國少傅兼太子太傅吏部尚
書中極殿大學士先公墓間府君之長子世系詳
別狀中不具述述兄之大者兄生而穎敏端重能
步趨輒脩大人儀矩屬對如響十二歲通經史百

家言儒先生遜不逮也二十二補弟子員試輒異
等銳志勤脩以顯揚為已任獎進我諸兄弟咸以
成儒辛酉赴省試時不肖病甚幾投卷而出會與
伯兄接席毅然不可遂終場領鄉薦既不肖成進
士且十載而兄尚困諸生於是從有司乞老不許
已而請益力不肖度終不可奪因輸貲得請于司
徒而兄弗憚也明年壬午為先贈公八旬兄自邸
歸迎而謂曰聞女以綵衣上我壽甚喜遂服焉辛
卯十月贈公薨逝兄配夏孺人亦相繼倏亡當是

時不勝擗踊而慙勉治喪悉稟于度問里歎服謂
無其知禮云郡邑大夫交相器重以得瞻眉宇為
幸伺兄服闋一賓鄉飲三老然非其好也世居影
泉里僅數楹而子姓漸繁於是不肖與少弟奉贈
公別居而兄朝夕從舊居來侍溫飽歷二十年如
一日舊居圯贈公命之新乃新仍其堂曰存養扁
其軒曰思過意念深矣自不肖之秉樞也聞有獲
于上輒喜聞不得為所欲為又輒跼蹐不自安
或謂胡不勸之歸休則曰國恩未報吾特任吾

私耳持已嚴重慎取與慕無雜寘坐無長物服食
無芬華與人言必遵孝弟念先贈公贈夫人淚潛
潛如孺子值諱辰或剪掃必洒泣歎歔晚而志彌
冲行彌篤曰吾雖老志志無敢媿越如行百里半
九十耳因自號半九翁所著有二清集懷仙歌各
若干卷尤工書與鍾王季孟也家故貧業儒益貧
夏孺人寔肩重而作率為諸姒倡於是內外咸給
課一子二孫恂恂循矩而趨寶完沈氏先世風若
孺人真冢婦也已兄生嘉靖乙酉十月四日卒萬

曆己亥十一月十有八日享年七十有五以皇
太子覃恩貤贈登仕佐郎鴻臚寺序班孺人生嘉
靖戊子十月九日卒萬曆辛卯十一月五日享年
六十有四子一即泰始由邑庠生入太學仕至光
祿寺署丞娶張氏男孫二延年郡庠生娶包氏延
齡由郡庠生入太學娶張氏曾孫三光宅聘舉人
董君應圭女光世聘進士周君昌晉女齡出光宗
未聘年出曾孫女一有英來字以萬曆庚子十一
月 日合葬于梔源鄉布釜古剎之東嗟夫吾

沈自勝國以來未有以詩書效者效之自伯兄始
可不謂大有造於宗若夫孝奉天經睦救群戚措
躬發口罔不由于正出于厚上無忝于祖宗而下
可為子孫法數言真足以貌兄矣銘曰疇哉而穀
龐所扶疇發而機儒所初疇克而家兄所圖佑啟
後人表百夫厥有宸書賁黃壚瑱珉峩峨辟耦
都

嘯鳴文集卷十六終